

GÖSCHNER LÄLLI '24

AHOL IHR NARREN



2. Röhre



Ich nix verstehen

Wenn äs im Dorf wieder tet stiibä
Und sich d Geschner verwunderet tend d Aigä riibä
Denn isch klar warum der Staib ummä schwirrt
Dass d Spaltmaschinä wieder mal ohni Wasser betriebä wird
Bi dr Beschwärdigshotline nimmt de ai einä ab
Wo nur Italiänisch redet und fascht kei Diitsch chat
Ja mend etz all Geschner inä Italiänisch Kurs gah?
Damit mä sich in Zuekunft tet verstah?
Stupida Polvere, ä Staib ä bleedä
Oder Porco Miseria das versteht vermuetlich jedä



Kleines Italienisch-Vokabular:

Tanta polvere nel villaggio ⇒ Viel Staub im Dorf

Tanto rumore nel villaggio ⇒ Viel Krach im Dorf

Quale asino ha chiuso l'acqua? ⇒ Welcher Esel hat das Wasser abgestellt

Venite subito e portate con voi un aspirapolvere ⇒

Kommen sie sofort und bringen sie einen Staubsauger mit

FSK 18

Vaffanculo ⇒ Lecken sie mir am Hinterteil

Porco della troia, puttana , dio cane ⇒ Piep, piep, piep.....



Die 10 Weisheiten des Alain Berset:



1. Hast du Ärger wegen Corona Leaks am Hut, dann tut dir ein Rücktritt gut.



2. Willst du entspannen dann steig in den Flieger ein, über den Wolken muss die Freiheit grenzenlos sein.



3. Nutze den Dienst der Super Puma Brigade, für einen Besuch an der Streetparade.



4. Bist du mit Ringier Chef ganz dick, stehen Insider Infos morgen im Blick.



5. Bestellst du Impfstoff in Massen, erhöhen sich Kosten der Krankenkassen.



6. Willst du bezirzen hübsche Frauen, lass wachsen grosse Augenbrauen.



7. Aus einem werde ich nicht ganz schlau, ist die Badran Mann oder Frau?



8. Ist dein Ruf mal ruiniert, lebt es sich ganz ungeniert.



9. Hast du Druck in deinem Sack, geht's im Schwarzwald zack zack.




10. Das ist nun der letzte meiner Verse. Bleiben sie gesund! Ihr Alain Berset.



Was machen unsere Bundessaläte?



Dr **Guy Parmesan** dr Wiibuur im Bundessalat
Wird wieder gwählt mit emä Top Resultat
Und jetzt isch är, mä muess es erwähnä
Dr amtsältischt Clown da ds Bärn änä



Dr **Ölbert Härdöpfelstock** macht si Job guet, das isch klar
Trotzdem wird er beobachtet vom Glättli Balthasar
I dr Beliebtheitsskala gaht es füre Ölbert steil nach obä
Das bringt die Grüene grad nu einsch zum toobä.



D **Viola am Chochhär** het Ärger mit denä ds Berlin obä
Tüend die doch wägä üsernä Rüschtigsgüeter tobä
Sie sett die Diitschä mit isernä Panzer versorgä
Das trifft sich guet, etz chemmer die schimmligä Fahrziig grad entsorgä




D **Karin-Keller Utter** tuet ihri Mässer wetzä
Und überall bi de Usgaabä dr Rotstift aasetzä
Leider chat au sie kei Gäldbäum aseiiä
Drum muess sie jedä 5er zweimal umdreiä



Dr **Ignazio Catziss** tuet iis nit so gfallä
Macht är doch im Usland ä schlächti Fallä
D Verhandligä mit dr EU tüend nit vorwärts gah
Isch ja logisch är het ja friener e italienischä Pass gha



D **Elisabeth Grotzä- Schniider** chli meh als eis Jahr im Amt
Het i irem Departement etz scho es Durenand
Denn die illegal Migration tuet sich für ds Tessin nit lohnä
Trotzdem würd d Elisabeth gärn in Chiasso wohnä



Dr **Jeat Bans** isch i Bundessalat gwählt wordä
Dr Jositsch hät im das nu gli verdorbä
Doch d SP chemmer gar nit loobä
Dr Jeat brchunt grad ds Asyldepartement is Arsch gschobä



Etz tritt er ändlich ab üsä **Alain Libertee**
Hets ds Bärn obä ändgültig gseh
Er tuet etz si Huet a Nagel chläbä
Mit dr Bundesröntä laht es sich ja guet la läbä




Diä Jungä!

D'Fischer und d'Jeeger «liget» sältä
das tuät fir Chlätterer ja gwiss ai gältä
aber Elias du hesch glich chli z'dick uftreit
das sig dr Manuel am Fläckistock - hesch du ys g'seit
diä Foti isch äs «Fake» miär säget ai dr Grund:
«S'brücht sicher nu ä rächti Zyt bis dr Steiner sonä Schnutz br'chund!»



Dr Manuel Steiner tuät im Meiätal Zivilschutz machä
bruchä cheng mä ihn ja fir ä hufä Sachä
bim Wildheiwä z'rächä – isch ihm aber z'sträng – bim Eid
hed liäber ä Heiwbläser dur diä Felsä ufä-treit
das Obsiferggä git «Muckis» - aber z'wenig – das isch ai dr Grund
dass är (nu nitt??) im Püräkaländer vum 2024 chund




Äs isch kei Sach sonä Grill zflickä
wenn chasch ä tifigä Vivian schickä
Är het immer z passend Wärchzig mitdrbii
ai wens hiä und da ä Spezialüftrag tuät si
Nur bi einer Sach, bitte bis Isichtig
wens widr sett üfgah, isch Heissliim nid z Richtig



«Weltrekord: «Mensch» Armin Schelbert hat den Grossen Mythen 6000 Mal bestiegen»




I dr Zitig tent's ä Muotitaler lobä 6000 Mal sig der gsi ufäm grossä Mythä obä und der Ma sig etz gli 80-ig Jahr miär gratuliäret – us dr Färni – das isch klar dr Tresch Sven isch ersch 20-gi – aber Ehräwort är schaffet ai scho amnä settigä Rekord diä erschtä 500 Ufstig Geschnä-Bärgsee macht är das Jahr sicher rund vorus-g'setzt dass SINI LIÄB IRINA wider als Hittäg'hilfin obsi chund



TOURISMUS GÖSCHENEN GÖSCHENERALP

Eis isch sicher - so einä wott ich abchaiffä am TGG der Heisswasserbottich nur ei Tipp liäbi Steiners, pflanzet ä Heckä zwe will all Tag wemmer ych nid fiddläblutt gseh




Dr Sven - ja äs isch bekannt
Isch mit sim Skoda unterwägs im ganzä Land
Geschänä isch ä scheenä Ort
Aber mängisch muäss mä gliich ä chli fort
Äs git aber leider eppis wo nä tuät plagä
Diä liäbä Marder wo a dä Schlüch im Aito tend ummä gnagä
Zwei Mal ischem ez wäg dem scho dr Göppel verreckt
Z Problem isch de aber schnell gsi entdeckt
Komischerwiis isch ihm das immer nur passiärt
Nachdem är amig z St.Gallä bi dr Fründin het logiärt...
Da gits nur eis - das ligt uf dr Hand
Blib doch eifach im scheenä Ürnerland!



ŠKODA



Chunt dr äs Aito entgägä mit rassigem Tempo und zimkli Krach
staht uf dem Charrä ganz sicher 'Bucher Dach'!




Mim Golf tuät dr Silvan gärä umäheizä
einesch zweimal uf Italiä apä diä PS chli gah üsreizä
z Fischerinventar wird vu Jahr zu Jahr immer gresser
da wär äs grüimigers Fahrzig gliich chli besser
nur hets är bi sim BMW leider nid so breicht
wills bi dem Geppel sitämä Zitli sogar innäsäicht



Fasnacht 2023

Z Itrummälä isch immer ä glungni Sach
bim Motto Büstell rächnesch ai epä mit chli Krach
ai d Bar wird das Jahr widr rege gnutzt
und da und dett epä ä Hammer id Wand putzt
Am andärä Tag bim Üfrümä gsehts de üs nu vil fataler
diä Wand idr Bar isch glochet wiänä Emmitaler
Diä Schuldigä hend sich sälber gstellt und alls id Ornig tah
so dass mä Gipser und Stromer keinä het messä ha




KAMU Wassä wird all Jahr kreativer
sie mached d Fasnacht nu chli attraktiver
Idr Chilä chatzämüsigä, das machemer zum Trend
ai wennis diä andärä Gmeindä nid unbedingt wend



CARNEVALE AIROLESE

Airolo ladet das Jahr widr i zum Carnevale
d Geschner mit 42 Stuck petschget üfä i der Olympia Saale
Am Umzug vum Namittag gherch sie gherig pohlä
all zämä Freid usser d Wassner, denä hends d Show gstohlä
Mim Dixie alli zum Tanzä chennä animiärä
und speter mit Lidäschaft midänand am Biärä
Dr Spiggi i Hochform ufem Traktor mit Schüflä und Bese
miär chemed gärä widr iär lässigä Airolese






**Iähr sind guäti Kollegä – sogar Cousins – mä weiss äs ja
und wurtet gägäsitig iäch etz niä la hangä la...**

**ABER – LA HANGÄ – Vivian und Manuel – chent's iäch scho vorstellä
hättet iähr am Gidelmändig – sonä Tafälä – äbä sellä**

**Schmudo 2023 fir das Jahr isch Gschicht
gesches a dä eintä a Oschtärä nu im Gsicht
So Mängä het scho messä Forfait gäh
und dr Apéro im Chraftwärch nimmä megä gnä
Aber das Jahr isch yhsärä Mati nu chli witer gangä
är het sogar grad a 2 Chraftwärchler messä ahangä
Wär är nid gsi wenä Gummiballä
wäret sie de midem nid bis i Turnhallä**



**KAMU het nid immer die glich Tour jedi Wett,
Einisch da einisch dert.**

**D Reschtaurament Tour isch cheibä schwirig,
Drum sind ja immer alli uf z Trinkä giirig.**

**Aber was letscht Jahr isch passiärt isch zum Schiässä,
Id Kantinä hemer nur einisch miässä.**

**Wo d KAMU isch richtig Kantinä gluffä,
Diä ment gar niimme meinä äs git eppis z suffä.**

**Z Personal tuät leschä z Liächt sofort,
will diä Agstelltä ai went fort.**



Im Oberland git's niw «ä Club» - oder sett mä sägä «Company»
 dr Jascha Schädler – Sebi Furger und ä ganzi Cliquä sind drbi
 schlittschuählaifä – Biär vernichtä – gmeinsam id Feriä und ad Fäschtli ga
 isch churz umrissä so de dr «Vereinszwäck» da
 vor dr Fasnacht 23 säget's unverdrossä:

«Ad Geschner Fasnacht gemmer all im glichä Out-Fit – g'schlossä!»

Als was genai – ja diä Entscheidig isch gli g'felt
 z'Gäld de zämä-g'riärt und dr Sebi hed fir alli bschtellt
 sowyt so guät – doch de wird's mysteriös - äs isch äso
 irgendwann isch de das Päcktli nämli cho
 Planzer – DHL – DPD?? tent z'Furgers nämli instruiärä
 wenn miär nitt umä sind – de chamäs imnä Wagä deponiärä
 nur bi dem Wagä – so tuät's sy
 gaht der Sebi ersch am Schmutzig Donnstigt de verbi
 und drum – wer weiss – isch's ächt äso?



Chad der Club erscht das Jahr «uniformiärt» ad Fasnacht cho




I dä letschtä Jahrä – ja miär säget's etzä
 tent dr Christof, dr Römä, dr Silvan z'Motto immer guät umsetzä
 und im Falle eines Falles
 stängt ja iäch dri gwiss fasch alles
 nur dr Heiligäschyn kombiniärt mit was ai immer
 passt zu keim vu iäch – land der im Zimmer




Am 18.11.2023 isch hiä Fasnachtsereffnig gsi
 das hed äs «Nachspill» gha – nu gli
 denn Geschner Chind – im ganzä viär
 säget: «Miär machet ai ä Chatzämusig – dur z'Quartiär»
 nur – d'Instrumäntä-Uswahl isch de nit so gross
 zwee Raviolibixä und äs Pärli Pfannädeckel bloss
 und dr Stubäbäsä hed diä Chlinscht nu packt
 laift vorüs und schlaht dr Takt



ä Frai spändiärt ä heissi Schoggi meint: «Der A-lass isch iäch g'lungä
 KAMU-Gurtnällä und KSUO-Lehrer hend's mal z'letscht Jahr nitt so anäprungä!»



Dr Vivian Walker tuät dr Böög a-zindä
 wo's zerscht mal polet dänkt är: «Schnell verschwindä!»
 Rännt de fort – susch gäbt's nu roti Ohrä
 hed bi dem Sprint sis Handy de verlorä
 merkt's zwar – hed's i dr Dinkli jedoch nimmä g'seh
 z'Gaby litet uf das Handy a – äs blinkt im Schnee
 dr Vivian cha das Telefon rettä – s'chund zum nä guätä Änd
 aber gib's fir dernig «brandheiss» Jöbs zum Gaimä doch i guäti Händ...



Wenn sich erwachseni Mannä a dr Fasnacht nit chent benäh
 Tuet es für das Triibä ganz klaari Gründ gäh
 Mr hend aber kei Mitleid mit so em nä Maa
 De dett het daheimä sicher d Fraii d Hoosä a.



...ä chli witter hinnä...!



Fischräiher hets das Jaht vilzvil ummä
diä Zahlä vum Wildhiäter hend näwä widr nid gstummä
Als Fischschutz, denä tuäni scho drfir
stellä ä Vogelschichi, das isch nid tiir
Ä sälbergmächti Hubs-Schiichi stahd jetzd näbem Riätlisee
so verchlipfä tend diä Räiher niänä meh
Doch diä Vogel hend de diä Schiichi grad umgnutzt
diä hätts nähmli nur vor lüter Lachä schiär putzt




Ider Geschneralp findet ä Hochziit statt.
Das setti besinnlich si und aj nu glatt.
Der Resi am Hochziit seit miär hend ä Pannä,
du musch da ebä blangä..
Was isch de los! Was isch de das
afa'zittärä duät der Mattli Thomas.
Äs isch doch alles im griänä Bereich,
ich bi treu und ha gmacht KEI Seich.
Chund sie nit oder chund sie doch,
Hergott hilf miär ich bi imänä Loch.
D Hochziitglockä littet,
der Thomas bätät und bittet
der Fähler...ganz genai...
der Pfarrer isch gsi im Stai.



**Im Herbst tuät dr Mattli Käri ender uf z Wurschtä tendiärä
 Diä zellet zu dä Beschtä, ohni z Plagiärä
 Drzuä gheerä tuät aber ai z richtigä Hänkä
 Mä wurdi bim Ablick de nid zerscht anä Schlangä dänkä**



**Bi z Peters im Gwiäscht miär tend nid liigä
 Sinds letscht Summer ei Stei am andärä am üfbiigä
 Afä id Jahr cho isch das Miirli underem Hüüs
 nur vu wem as diä frischä Stäi sind, s'chund niämer drüs
 Ä Laschtwagä fahrt zuächä midärä Gasparini Blachä
 Sogar Dr Konrad cha fascht nimmä vor lachä
 D Hälfti isch fertig bis im Oktober diä ander folgt im Mai
 Dr Lälli understitzt dr Konrad: Idr Geschneralp häts ja gwiss gnuäg eigni Stäi**



**Dr Näf Christian ganz ä flissigä Burscht
 Was Ander säget isch ihm vielfach wurscht
 Mit sim Quad oder Traktor scho parmal uf Geschänä blochet
 doch dr Taxibus hed är hiir z erschmal verlochet
 passiärt isches z Wiggä nach dr Barrierä
 will är nid ufem Parkplatz unnä het wellä cherä
 dr Lälli seit da drzuäh ganz banal
 fir z Cherä mit dem Bus isch d Schtrass eifach z schmal
 aber wiä am Afang beschribä stossemer nid uf offni Ohrä
 somit hend dr Näf und sini Hälfer sogar Anker messä bohrä**



Amä schenä Fiirtig im Summer im Geschneralptal
 Ghert mä vu witem einä johlä, das isch sis Ritual
 Nur weiss das niämer, äs isch dr Hirt vum Näf Christian
 Der riäft a dä Geiss wiä im Film dr Tarzan
 D Liit vos gheret alarmiäret sofort d Polizi
 Mit dem isch epis passiärt das muss etz si
 D Rega fliegt de im Älprigä üfä und apä
 Dr Näf brchunts mit, montiärt Schuäh und Chappä
 Bevors los gaht gib i am Hirt äs Telefon
 Bisch dü der wo so lärmest im schentschä Ton?
 Das ganzä hättmä sich de guät ai chennä sparä
 Zum Glück nid passiärt, halt eis oder zweimal meh mim Taxi fahrä



Allrounder Näf:

Vum Pürä über Taxi, Chäsä, bis zur Zimmeri
 Probiärt sich dr Näf ai eimesch idr Chirurgie
 Was nu niämer gschafft het, macht är gwiss
 Flickt sogar mit Heissliim az Waldemar´s Bernadette z Biss



BERGGASTHAUS DAMMAGLETSCHER GÖSCHENERALP



Z Hotel Dammagletscher erstrahlt i frischer Pracht
 das het doch d Büüplanig Simmen ganz guät gmacht
 Fählä täig nurnu sonäs Muschterzimmer im obärä Stock
 agmäldet zur Besichtigung dr Verwaltigsrat CKW firnä Hock
 Doch as mä sonäs Zimmer cha präsentiarä
 setts fertig si, mä muäss sich fascht schiniärä
 De liäbä André, Längi mal Breiti sett doch z mässä si
 am Bodä fählet zwe Legänä und a dr Dechi ai zwe oder dri



...diä witter unnä...!

Äs OpenAir Ticket muäsch afä fascht erstählä
am Gampel gwiss, da derf ai dr Echser Tobias nid fählä
Mit dä Mädels redet är dunnä i allnä Sprachä
zwischenet denä Zält und all dä Biärllaachä
Eis sind sich etz aber diä Openairbsuächer dunnä gwännt
wos drum gangä isch welä, hendä amal all ufem Fötäli widr erchännt




Z Wassä findet ai das Jahr dr Chlaisizug statt
isch eher chälter wordä und drum vor dr Gmeind zimli glatt
Mit Ifälä und Trychlä dr Chlais begleitä
und ihnä mit dä Chind Richtig Dorfplatz leitä
Fir diä lheimischä ä Tradition wo afä chli hangt
sie meinet epä sonäs Tee oder Kaffeeshnaps wär nid zvil verlangt





Samichlais ich versprich drs wenn z negschmal chunsch
Giz fir dich äs Kaffeewätschgä und nid nur der lappi Punsch



**Dr Alpabzug z Wassä isch ä Hit,
 Wills das ja nid immer git.
 Doch letscht Herbscht isch gsi ä huärä Hitz,
 Und das isch wirklich gar kei Witz.
 Z erscht het z Gipfäli gmacht am Näf ä Geiss,
 Will äs isch gsi z Wätter so heiss.
 Witer unä het dr Kantöndler gar kei Luscht,
 Will diä Chiä hent ä grossä Durscht.
 Wasser hent diä Chiäh wellä,
 Und er het nid gnuäg Chessel megä üsä stellä.**



**Z Gurtnällä unä gits ä Maa,
 Vo dem chentsch glaubs alles ha.
 Er het ja scho viel usprobiert,
 Aber längerer Zit het är nid durä gstiärt.
 Ä Container het de miässä anä,
 Gstuunt hent de z Gurtnällä diä pensioniertä Mannä.
 Dr niwschti Gäg isch gsi,
 Tikigrindä sind ai scho wieder verbi.
 Im Internet het mä diä Kunscht äi chenä bestunä,
 We viel das bracht het, weiss nur ä guäti Lunä.
 Ja dr Tschengell het eröffnet diä Tiki Garage,
 Aber etz isch diä äi scho wieder am Arsch.**



Inserate

schneefräsen
Sommer Service



Daniel B. Winterhalte, Göschenen

Anfängerkurs
2024
Ziegenruf-
techniken
Ch. Näf, Geissenparadies



sekundenkleber
Günstig abzugeben



Melden sie sich bei:
Kantonspolizei Uri

Beratung
Videoüberwachung



Sie wollen eine Videoüberwachung?
Wir beraten sie gerne.
Bistro Göschenen

Gesangsunterricht
für Opern



Walter Baumann

Fischerpatent
Suchservice



Noah Mattli

Parkplatzfelder
einzeichnen

PARKING ZONE



Wir zeichnen ihr Parkplatz
Feld ein

F. & T. Baumann

Jäger, Fischer und andere...




Nach 120 Jahr (!) isch d'Hubertus Mäss z'erscht Mal z'Geschnä gsi
ä grossi Zahl Jeeger findet sich de i dr Chilä i
vill Komplimänt gitt's fir d'Geschner – wo scheen hend dekoriärt
und firä Bumä Marco – wo das heigi organisiärt
wobi – dr Marco temmer all ja vu dr Fasnacht kännä
drum meint ä altä Jeeger: «Ja das memmer suber trännä...
dr Marco hed das super g'macht – si Ufgab guät erfüllt
und glich bini froh hed dr Imholz Werni Jagdhorn – und nit dr Marco Trompetä g'spillt!»



JÄGER-LOTTO

D'Urschner Jeeger machet ä Niv-Jahrs-Lottomatch
diä Idee isch guät und gwiss kei Quatsch
Fleisch-Prisä git äs z'gwinnä – ja das lyd im Trend
zum Bispill SIW – und was diä Jeeger susch nu g'schossä hend??





Nit motzä Vanessa – säg äm Briäder «DANKÄ»
 der fischet NITT mit Wirm – sini Köder choschtet a diä 100 Frankä



Dr Fedier Peter gaht viel ga fischä
 Laht sich au gärn sonä Forellä uftischä
 Bim Staudamm det isch siis Revier
 Dett macht är Jagd uf die Flossätier
 Eines Tages, d Bräntä isch voll
 Das findet dr Fedier ganz ganz toll
 Daheimä wett er der Fang de notiere
 Dr Fedier tuet sini Händ verrierä
 Ds Patent das isch unuffindbar
 Das muess nu ufem Damm si das isch klar
 Dr Noah Mattli gfindet das Dokumänt
 Es riisä Glick, dass jedä dr Fedier kännt.




Kanton URI

Fischerei-Patent
 2023

Fedier Peter

Feriäfotenä macht jedä eppä tusig hitt
 aber... dr Mattli Silvan und d'Gina sind das nitt...



...unterwegs...!

Melissa Naschenweng, ä wunderbari Frai
as sie nid nur cha singä, wisset dr Dani und dr Beat gnai
Äs Openair im Bindnerland staht vor dr Tirä
da nähmet diä zwe gärä ihri Läderhosä firä
Nähmet diä Fahrkilometer voller Vorfreid under d Reder
bim Apéro idr Bünd hockets de aber ufzmal greder
Denä Zwe gahts diräkt dur Mark und Bäi
am liäbschtä wurdets sofort widr häi
Und das alles wägä dem simplä Grund
wonä dr Wirt seid, as diä Naschenweng ja gar nid chund



D Gruppä Gabalier ai das Jahr underwäx uf Kitzbiähl
sie wends nu einesch wissä und gend dri i das Gwiähl
Dr erscht Abig schiins nu chli verrägnat
und diä reschtlichä Täg nu midärä Närväsagi gsägnat
Äs hibsches Fralein tuät diä Mannä nämli atänzlä
leider het diä zvil Alkohol intus so dass keinä fat afä schwänzlä
Ai dr Werni het nid gross Freid was diä tuät Schwafälä
derfem sie doch sägä är tanzi wenä Schalltafälä



Ai diä jingärä Gabalierfans sind widr mitdrbi
wovo einä immer bi dri Schweschtärä tuät si
Dr Roman het a einärä Gfallä gfundä und redet offä und frisch
bis är leider vernimmt, as diä Muotithaleri scho Muätter isch



Vereinsläbä

Bidr Abschlussprob vu dr Fiirwehr isches Tradition

Lokal putzä und nah anä Yaksportion

Das Jahr jedoch sehr speziell

gaht ai z WC putzä enorm schnell

Zerscht wott keinä so richtig i der Schloffä

epper machts de scho, chamä nur hoffä

Bis 2 Fraiwäli vorem Lokal parkiärä tend

wo beidi dringend uf näs WC mend

Weiss nid ob dr Eint odr Ander bi derä hätt wellä landä

will uf z Mal sind si z 3tä mit Birschtä parat gstandä



Was tuät dich am meischtä flashä

Wenn ä Präsidentin tuät d Versammlig crashä

Sicher nid immer eifach sonäs Amt z verträätä


Hiä und da steinigi Wäg - da hilft nurnu bätä

Nichts desto trotz isch am Lälli epis dra glägä

adr Alt Chiläratspräsidentin härzlich dankä z sägä

fir ihri Arbet und mängi guäti Tat

wo sie hed gmacht all diä Jahr im Chilärat





Hinten, von links: Marino Walker (Jubilar), Stefan Baumann (neuer Präsident), Josef Gamma (abtretender Präsident); vorne, von links: Jakob Zraggen, Reinhard Wyrsh und Josef Dubacher (alles Jubilare). FOTO: ZVG

**Vo dr GV MG Geschnä/Wassä
g'sehmer diä Foti – und miär chend's chüm fassä
ja ai miär chend nitt all Chatzämüsiger mit Namä nännä
aber nach 50 Jahr Mitgliedschaft – da settet IÄHR dr TINI kännä**

Zum 1. Aiguscht ladet dr Fasching und d'Fyrwehr i
«VILÄ DANK» das Fäscht isch SUPER gsi
dass epper dr 1. Aiguscht macht isch mä immer froh
nur fraget sich ä hüfä Lyt de: «Wo ai wo??»
Schribet z'negscht mal «elf-elf» wenn's gaht
oder dass äs ALLI g'findet – HALLÄBAD



**Der Fasching-Club und die freiwillige Feuerwehr
Göschenen laden ein...**

... zum Bundesteiertag

Fest mit Live- Musik Klosterbrüder aus Flüelen

Festwirtschaft mit Getränken und Grill

Montag, 31. Juli 2023 -Ab 15.00 Uhr Spiel und Spass für Kinder

-17.30 Uhr Aperö offeriert von der Gemeinde Göschenen

-Anschliessend Festwirtschaft mit Klosterbrüder

-Feuerwerk (Wetterabhängig)

Wir freuen uns alle zu begrüßen

Fasching-Club Göschenen



Freiwillige Feuerwehr Göschenen

...dies und das...



Äs Fiirwärch tends am 1 Aiguscht z Luft lah
ei Ragetä na dr Andärä lends lah gah

Nur wichtig bim Zämärüümä gilts z Beachtä, das isch äso

äs chent de nu heiss si, prompt wärnä der Schochä fascht äs zweits Mal acho



Ä frisch Chuchi à la Zraggen tends innä
d Familiä Mattli im undärä Bonacher hinnä



Ai ä integriärti Bar wird erstellt vu dr Schnüzäbändi

da memmer nu Barhocker ha aber nid derä vu dr Landi

Nur Lukas einesch ä Meter z Hand näh hätttsch sellä

und nid nur ufä Priis luägä bim bstellä

Gmerkt het mäs de halt chli speter

as denä Hocker fählet 20 cm



Bi dä Iheimischä si äs wenä Giftspritzi
z ganz Jahr sit niwschtem a dr Wärmi sitzä

und wens Arbet git grad gar nid nitzä

Willkommen Verkehrsregelung Kreisel Göschenen



**Firä Lochstafel und Pischtäwäg wärs guät wemmä epis hätt
 wo liächter isch als z Pischtäfahrzиг und glich ai mimä Glettibrätt
 Git nur 1 Option wer mä da muäss fragä
 dr Firwehrkommandant , der het ai dr Zit under Tagä
 Mit Ideeä nid sparä, dr Chopf isch vollä
 ich machä ych grad firä Quad ä sonä Rollä**



**D Schädäwehr Geschänä muäss ä gwichtigä Abgang verchraftä,
 Will der Schnüggä vo Wassä tuät etz nimä umä gaffä.
 Er het dr Job gwäxlet uf Andermatt,
 Det schtellt är sicher alli gli Schachmatt.
 Wiä dr Lälli sicher weiss,
 Verliert er dert obä äi nid viel Schweiss.**



**Dr TGG wiä mä ja weiss,
 Het abotä in Abfrutt Feuer und Eis.
 Verbi isch es jetzt mit derä Attraktion,
 Will vom Laboratorium dr Urkantone gsi isch ä Spion.
 D Wasser Qualität isch gsi zum Motzä,
 Äs Wunder dass niä epper het miässä chotzä.
 Ds Problem wo dr TGG jetzt no het,
 Äs chämtet immer no gnuäg Bsuächer jedi Wett.
 Guätschinä wo jetzt no im Umlaif sind,
 Diä chasch z Luft riärä vilicht nimts ja dr Wind.**





Schnitzelbänk hend d' Buäbä z'letscht Jahr g'sungä
trotz äs paar Pannä meinet d' Lyt: «He - nitt schlächt g'lungä!»
Ai «d' Bertli-Jeeger» tent diä Sängler lobä
meinet nur – mit Rächt: «Nitt g'schadet hättet iäch nu zwe – dri Probä!»
Sie versprächet: «Als Schnitzelbänkler simmer z'negscht mal ai drbi
iähr chenet ja de d' Vorgruppä vu dä 'Bertli-Singers' si!»
NUR... bis etz hed mä nu nyd g'heert vu denä Liäbä
tent's ihrä Uftritt ächt nu umnä's Jahr verschläbä???

Dr Lälli meint: «He z'negscht Jahr sind'r doch drbi
dr Hasä und dr Marco sind bi dä 'Seerosä' i dr Lehr ja gsi
miär hoffet 2025 uf 'd' Bertli-Singers' susch wärs schad
'd' Vorgruppä' wär – wiä jedes Jahr – parat...!»



Andreas Meyer man kennt ihn noch
Eröffnet 2015 das Neat Loch
Die Bergstrecke sei jetzt nicht mehr wichtig
Da war der Andy wohl etwas kurzsichtig
Rückbau auf ein Gleis war sein Plan
Fertig mit Romantik der Gotthardbahn
Doch das BAV durchkreuzte die Idee
Meyers Abrisswahn war passee
Fast 10 Jahre später wurden wir eines Besseren belehrt
Die Bergstrecke ist jetzt wieder sehr begehrt



Dr Lieblingskanton vo iis isch Züri
Denn ohni Z würds heissä Üri
Doch d Zircher findemer nit immer toll
Die nähmet iis Bärkler eh nit für voll
Im März 23 isch es gsi, ohälätz
Parkiert sonä Zircher grad uf 2 Parkplätz
Der het dänkt bi denä Hinterwäldler chanis machä
Doch mier Geschner findet das überhaupt nit zum lachä
Dr Vivi parkiert drnäbt, schittlet nur dr Grind
D Tina meint nur der Zircher spinnt
Der Herr isch gschäftlich ds Geschenä gsi
Beratet d Gmeind bi eppisem äs blibt drbi
Was ai immer der Zircher mit Beratigä wiitergit
Um näs Parkplatzkonzept gaht es vermuetlich nit.






**Klick klick klick
klick klick....**

**Um z'Theater vorz'bereitä brücht's ä hufä Sachä
unter andrem heisst's: ä Foti firä Flyer machä
dr Vivian seid: «Ich lyt dr Zoe a – diä chund rasch appä
diä sell eppä 30x drickä – und de settis klappä!»**

**Chüm isch Zoe wider dobä tuät dr Vivian erniwt a-litä:
«Settsch nu einisch cho – dr EICHHORÄ luägt schint's uf diä faltschi Sitä!»
Zoe chund nu einisch – ja isch gwiss ä flotti
und dermal isch-mä z'fridä midrä Foti
alli luäget etzä frindlich und mä glaibti fascht
dr EICHHORÄ grinst äs bitzli uf sim Ascht...**



**I DEM ZÄMÄHANG DA TEILET MIÄR IÄCH GÄRÄ MIT
DASS ÄS IM APRIL WIDER ÄS THEATER GITT
DR EICHHORÄ – SINI MITSPILLER – ALLI INFOS UND NU MEH
CHENDR GLI SCHO WIDER UFÄM FLYER GSEH**



**Schaffä uf dr Pfläg isch nid Jedem gäh
Fir Zoe sälbsterständlich all ihres Härzbluät det drizghäh
Mim Roller gah wörkä bi Wind und Wätter
Bi Sunnäschiin und ai Rägägschlätter
Amä schenä Tag d Moschtlampä faht afä rot blinkä
Z Gurtnällä acho und grad am Walker Kilian chennä winkä
Liäbi Zoe ai wenn zwischeddurä musch pressierä
Vergiss nid epä ä Blick uf d Tankazäig z riärä**



**Wenn es ds Geschenä wieder mal tuet schitterä
 Tüend Gwissi scho wieder e illegali Sprängig witterä
 Doch letscht Jahr im Septämber isch es nit ganz e so
 Im Strassätunnel isch e Teil vo dr Techì abbä cho
 Das es wäg dä Sprängigä isch het ds ASTRA sofort abgestrittä
 Da fragermer iis scho, a was sett äs de suscht liggä!
 Ds Astra suecht ä Lösig und gfindet die au
 Die Techì hanget wieder ganz fix, genau!
 Nacherä guete Wuchä het mä dr Vercher wieder la rollä la
 Es het nu Sekundäliim vom Frielig voorig gha**



**Dr Beton Dani wott nit sii ds spaat
 Drum macht är im Summer scho d Schneefräsi parat
 Es macht Krach und raichnet es isch e Gruus
 10 Min. speter staht d Polizii vorem Dani sim Huus
 Ja das gaht, wie miär wisset ds Geschenä gschnell
 Wahrschinlich het dr Sebi gmeint es sigi e Maschinä vo dr Bustell**



I dr Gmeind isches mit dä Beizä afä schled
 Zum Glück gits z Bistro, das Gäschemagnet
 A dr Fasnacht offä bises faht afä dunklä
 Doch am Schmudo fänds pletzlich afä munklä
 mäh gherts vu da und det
 da machi etz jedi Wett
 etz giz de glabi Schwarzä Schnee
 dr Gmeindspräsident im Bistro? hani etz ai z erscht Mal gseh...



Vo dr Kantinä gheert mä etliche Gschichtä
 Da gääbts im Lälli einiges ds brichtä
 Doch was stimmt und was nit isch schwierig ds sägä
 Da muess mä bim Dichtä scho chli abwägä
 Hygieneproblem oder schlächts Ässä
 Dr Salat wärmer als ds Suppä, Personalwächsel nit vergässä
 Das alles muess d Chatzämüusig nit interessiere, gottlob
 De sit letscht Jahr hemmer det ja eh Huusverbot



A dr Herbst-Gmeindsversammlig – s'isch äso
 hend dr Jim-Peter und d'Daniela z'Geschner Birgerrächt brcho
 miär findet's super – dass mä das äso tuät b'schliässä
 und mä diä zwei etz als «Y-heimisch» chad begriässä
 und glich fragt einä am Apéro zu spater Schtund:
 «Also dr Tom isch etz nunit Schwizer...jä... und de dr Hund?»



Ai mit dä chlinschtä Chind – chasch z'Geschnä eppis machä
 Muki-Vaki-Turnä isch nur eppis da - vu villnä Sachä
 i dr protestantischä Chilä laifis mängisch rund
 dettä gäbis doch diä «Chrabelstund»
 «Ai diä katholisch Chilä chad zur Chinderunterhaltig vill bi-trägä»
 tuät dr Zraggä Ernst de a dr Chilägmeind grad sägä
 denn z'Chilägässli sig offä – aber halt ohni feschtä Belag
 etz heissis: «SÄNDÄLÄ MIT DÄ CHLINÄ» i dr Chilä gli de - jedä Tag



International
 Neue Zürcher Zeitung

In der Türkei ist der Tannenbaum ein Politikum
Auch westliche Weihnachtstraditionen spiegeln sich in der Neujahrsfeier – das sorgt für Diskussionen

Nitt nur i dr Türkei problematisch – nei äs isch kei Witz
 dr Wassner Chrischtbaim isch chli schwächtig und dr Geschner hed zytäwys kei Spitz



Dr Husabwart vo dr MGB tuät äs Jöbli fassä
 Ä Plattä go mässä - äs sett ja schliesslich alles passä
 Diä Mass go nä chat är aber nit epä a dr Neechi naa
 Nei, är muäss uf das Disentis apä gah
 Vorem Zrugah sett mä de aber doch ä biz studiärä
 Und gschiider alles zwei Mal kontrolliärä
 Wenn de nämmlig nur 2 vo 3 Mass hesch
 Luägsch am Schluss chli dumm us dr Wesch...



20 anghendi Tourismusfachpersonä tend über Geschänä schribä par Sachä guät, diä Andärä eher chli übertribä Vum regelmässigä Bahnhoffäscht bis hi zu Bildprojektionä setti sich, da sind sie sich sicher, ä Bsuäch in Geschänä bestimmt lohnä Ai d Kunscht setti mä vil meh mit ibeziäh nu me?? meint dr Lälli - het sälber chli Miäh Alles chentmä und settmä optimiärä meinet diä Rätschbäsä miär hoffet etz nur, der bricht heig nid z Mängä gläsä



TOURISMUS
Ein Füllhorn von Ideen für Göschenen
 Rund 20 anghende Tourismusfachpersonen der Höheren Fachschule für Tourismus & Outdoor IST AG in Zürich loteten das genutzte und ungenutzte Potenzial des Dorfes aus.



Ein regelmässiges Dorf- und Eisenbahnfest rund um den Bahnhof würde Leben ins Dorf bringen. Bild: Florian Pfister (Göschenen, 9. 8. 2023)



Gmeindsversammligä sorget immer fir Diskussionä vum Fiirwehrlokal bis hindärä id Bohnä Gherä tuäsch dettä so Allerlei dr bescht Vorschlag: z Underdorf pflaschtärä mit Bsetzistäi



Um z Hotel Krone um kei Platz meh zum Rangiarä gemmer doch id Bitzi hindärä der Ahänger gah parkiarä Steerä tuäts schiins All, chasch machä was willsch dr Lälli meint: Wichtig as All Bsuächerparkplätz fillsch



**Dr Vivian seid zum Fedier Peter: «Bis doch frinä
scheen dass yers Theater im UW tuät erschinä
wäg dr E-mail-Adrässi – lemmer d’Reklamation la blibä
soläng diä nit ‘www.fc-schattdorf’ nu tent schribä!»**




Theaterfreunde Göschenen – Aufführung

20.00 Uhr, Aula elf-elf, Göschenen. Komödie in drei Akten. Platzreservation: Ab 15 Uhr unter Telefon 079 486 23 87, Topfkollekte und Kaffeestube.

→ www.theater-bristen.ch



**Wenn am Samschtig wotsch Ländlermüsig losä,
De muäsch de aber friä id Hoosä.
Wenn einä gherch Sagä und Schpaltä,
De bisch sicher nid falsch idr Winterhaltä.**



**Klar isch äs Theater nid aitomatisch guät und gschyd
nur will einä ufmä Sofä lyt
nei der wo lyt – das wäri z’Ziel
muäss das – wiä z’Geschenä machä – de mit Eleganz und Stil
drum isch z’Geschner Theater ai z’Hollywood nit unbeachtet blibä
im holprigä ditsch/amerikanisch heiget’s g’schribä:
«Well the Auftritt von Fedier on the Kanapé – a very starker
leider we have not ä Oscar for «The beste Schnarcher»!**



Z Ambri Heftli Gazzetta läsä gschwind
de muäsch hiänta lachä wenäs chlises Chind.

Dert gsehsch de epper posiärä gärä,
drum tuät är ai im Theater umä plärrä.

Im Ambri Fanclub Obwaldä, das tuät stimmä,
siget d Fleur Tresch und dr Simmä.

GAZZETTA DELL'
AMBRI



Bi dr Getränkebschtellig fir z'Theater laift äs nit so schlai
wer wenn missverstandä het - weiss niämer gnai
dr Furger Fredi hilft dä Theaterlyt bim Getränk versorgä
ai ihm blibt ä grossi Mängi Fläschli nit verborgä
und är meint: «Eppis lyt gwiss uf dr Hand
iähr hend meh Rivella blau – als alli andrä Lädä wonäs git im Urner Oberland
z'Biär gaht scho fort – sicher – wenn du d'Geschner kännsch
aber Rivella blau – das süft kei Mänsch!»



Biär ja,
aber Rivella
blau...?

Und är hed rächt g'ha – s'isch ä wahrä
bim Rivella Blau Rückschub – da muäss mä zweimal fahrä
am Prophet Fredi aber – wer hät das dänkt
hed z'Theater am Schluss ä Sägser Packig BLAU de g'schänkt



Dr Bümä Erich het miässä wärdä über 50. Jahr
Bis är gfundä het ä Fründin das isch Wahr.

Ü50



Zumnä Fyrabig-Biär hend si sich zerscht im Bistro troffä
dett isch gmiätlich – aber nur bis am halbi sibni offä
Durscht hend am säbä Abig nu all Mannä schiär
si sind sich vor äm Bistro einig: «Nu rasch ids Ressleri anäs Biär!»



Fraiä het's dett ai drbiä – das wemmer nitt vergässä
diä meinet: «Biär wemmer ä keis – miär wettet eppis ässä!»

Doch im Ressleri git mä derä Gsellschaft de z'verstah:
«Rasch eppis trinkä chender – nachhär settet iähr de ga!

Miär sind belaschtet zimli fescht
miär hend nu ä hufä Hotelgescht!»



Dussä stand diä Mannä zämä – wiä diä altä Eidgenossä
«La hei-schickä lemmer ys vu denä nitt» – meint einä ganz verdrossä
und diä liäbä Fraiä lant diä Mannä nit im Stich
diä eint meint: «Wenn du ids Gwiäscht fahrsch – fahr ai ich!»

Fröhlich chund mä de dahinnä a

«Mend chli zämä-rutschä!» heisst äs da
aber si sind nätt – ä Leesig git äs immer

«Diä Chlinschtä gend ids Bett – diä Gsellschaft chad ids Chinderzimmer!»

Dett hed mä g'ässä – trunkä – g'lachet und referiärt
nachäm Ässä hed d'Wirtin nu äs Schnäpsli g'offeriärt
gwissi mend nu niächter blibä – hend der Schnaps nit wellä

und tent nä dä jungä Purschtä anästellä
das leest ändgiltig allnä ihri Zungä

scheeni Liäder sind erklungä

und gwiss: Cavaletti – Epp – Steiner – Walker – diä andrä weissni nimmä
hend wunderscheeni klari Stimmä

doch irgendwann isch z'Personal de cho:

«lähr singet scheen – nur halt fasch ZU FORTISSIMO!»

sie sälber wurtet gärn nu losä

aber d'Hotelgescht diä stiget langsam etz id Pyjama-Hosä

das g'sehnd alli i – diä meischtä Sängler sind ai miäd

singet: «ciao amore» ganz lislig nu – als Abschiedsliäd

uf dr Stägä fragt ä älträ Ma – ä ganz ä nättä

«Wenn tent iähr wider mal dahiä ufträttä?»

D'Frag blibt fir ewig - s'isch äso

hed's ihm g'fallä – oder tuät är niämé cho?

Zwänzg Beizä git's nimmä z'Geschnä - Beizätour isch chli

aber gmiätlich chanäs mängisch glich nu sy





Im Jumbo tuät dr Vivian dur diä Gstelä laifä
wett eppis firä Dädi dett uf d'Wiähnacht chaifä
ä Büstellä-Radio gseht'r – schwär und kompakt – ja Ehräwort
«Das isch äs!» - dänkt'r – zahlt – isch mit dem fort
Am Wiähnachtsabig – vor dr Bscharig seid dr Vivan zum Janick scho:
«Am Dädi gibi eppis fir uf d'Bustell – weisch - ä Radio!»
Wo dr Raini z'Gschantk uspackt meint dr Janick aber: «Briäder – du Profässer
das isch kei Radio – das isch ä Komprässer!»
Zur Verteidigung vum Vivian muäss mä sägä – s'blibt drbi
so ufä erschtä Blick – chent's gwiss ä Radio si
und wenn mä de nid ufpasst – sich nitt konzentriärt
isch so eppis gli passiärt
und z'allerscheentsch so tuät dr Lälli meinä
dr Raini seid: «Ä Komprässer chasch fir viles bruchä – dankä – ha nu keinä!»



Dr 80. Geburtstag fyret dr Fasching doch das Jahr **80**
äs Fäschtli muäss sy – das isch ja klar
äs Jubiläum fyret z'Fedier Gaby – dr Peter dänkt: Gottlob
chaift am 17.10.23 dr 75. Plaschtiksack im Coop




I dr altä Chilä seid ä Chloschterfrai zur andrä Schweschter:
«Äs alts Näscht vum Lewä?? Das isch nitt UR(I) HITTÄ... das isch URI GESCHTER!»



Ei Geschner isch bim andrä am Silväschterässä
 si redet chli – tent d'Zyt vergässä
 am elfi will dr eint de hei
 de meint dr ander: «Los etz – nei!
 Ä guätä Tropfä hani grad nu uf dr Sitä
 blib da – bis d'Chilägloggä tent z'niw Jahr i-litä!»
 Iberredt isch de dr ander gschwind:
 «Janu – uf mich da wartet keini chlinä Chind!»
 NUR uf z'GESCHNER CHILÄGLIT da chent's lang wartä
 drum tuät de disä am zwei sehr schwankend ufä Heiwäg startä



Diä «Chli Niderdorf-Oprä» hed allnä g'fallä ja bim Eid
 ai d'Trix Mattli und dr Bumä Walti hend zum Erfolg dett vill bitreit
 trotzdem Walti fir diä Liäder z'iäbä
 setsch z'negscht Mal dich i Wald verschläbä



Mitti April WIÄ JEDES JAHR
 fragt mä sich – ja isch das wirkli wahr?
 Mä cha sich's eifach nitt erklärä
 d'Gmeind ladet wider fir d'Versammlig i vo färä
 aber am Schluss sind alli wider froh
 äs gitt ä super Apéro



EINWOHNERGEMEINDE GÖSCHENEN
 Einwohnergemeindeversammlung

EINLADUNG

zur

Gemeindeversammlung

auf

Freitag, 21. April 2022, 19.00 Uhr in der Aula elf-elf

Im Anschluss an die Gemeindeversammlung lädt der Gemeinderat Göschenen herzlich zu einem Apéro ein.

Göschenen, 4. April 2023

GEMEINDERAT GÖSCHENEN

Gemeindeverwaltung Göschenen
 Göschenenplatzstrasse 5a
 6487 Göschenen

Telefon: 041 865 13 89
 E-Mail: gemeinde@goeschenen.ch
 Internet: www.goeschenen.ch

**Ä hufä Fisch wo umägumpet
Wasser wo wird usäpumpet
Bis zu dä Hüft im Wasser stah
Dräck überall uf dä Chleider ha
Es isch sträng und äs git kei Lohn
Herzlich willkommen bei der jährlichen Teich-Putz-Aktion!**



**Was isch z Geschänä einzigartig uf dr Wält?
Diä legendär Istdisco ufem Natürisfäld
Usglassni Stimmig pur, d Bsuächer sind glücklich und froh
ai das Jahr wieder super gsi das gseht hoffentli Jedä äso
und Allnä Andärä wo z ganz Jahr niänä chemet und nur Dähäimä sitzet
meint dr Lälli im Minimum simmer froh wemmer ai diä vum Istdisfäld understizet
Fir der Abig verdiänet iär äs äxtra Bohni
Äs guäts Gsüff sigäs gsi der El Tony**



**D Patricia Mattli gad im Coop z Geschänä go poschtä
Vergisst de aber dass es ai nu eppis tuäd choschtä
D Sachä ipackt und scho het sie wellä gaa
Am anderä Ändi vo dr Kassä tuät dr Spetzi mimnä Grinsä stah
Är seit nur: ich weiss ja scho dass eim hitzutags nit me wird gschänkt
Dass es so schlimm isch mim Gäld, hätti ez aber doch nit dänkt!**



Klimakleber

Letscht Jahr a Oschterä isch es passiert
Ä Hordä Wildi hend sich vorem Tunnel deponiert
Ihri Täapä mit Sekundäliim prepariert
Und die de ufem Asphalt montiert
Dass so eppis nimmä vorchunt vo derä Briederschaft
Het dr Kanton etz ä Street-Cleaner 2000 agschafft



Wenn dis Chind speter wett ä Klimachläber sii
Muess mä frieh afa, es bliht drbii
Dass es scho cha übä bevors cha laifä
Chasch em Playmobil Klebe-Kids chaifä



Nach dr Summerzyt-Umstellig merkt mä gschwind:
«Nur d'Abigstundä wärdet heller – d'Klima-Chläber blibet wiä si sind!»



Dringend Lagerhalle gesucht!

Ich suche dringend eine Lagerhalle für die Einlagerung meiner geliebten Bergkäse!

Leider hat sich der jetzige Standort nicht bewährt...

Die Klimatisierung funktionierte leider nicht richtig!

Ansonsten ist der Käse einwandfrei!!! (siehe Foto)



Kontakt: Dartin Mubacher, 6487 Göschenen, 079 999 99 99



Zum Schluss!



Liebi Närrinnä und Narrä oder was es au suscht nu so git

Es rumplet wieder a dr Fasnacht 24, es isch so wiit

Mr wend ä scheeni Fasnacht zämä verbringä

Nätt und respektvoll und nit wieder afä spinnä

Konfetti la tanzä und d Trummälä la wirblä

Gmuetlich zämä hockä und äs Bierli zwirblä

Märsch dur ds Dorf und ds Tanz i dr Aula elf elf

Mr wend singä und joolä wiä Vogel und Welf



Scheeni Fasnacht 2024 wünscht iich ds Lälli Team!